

## প্লেন ক্রাশ এবং চেনা মানুষেরা

### কাজী জহিরুল ইসলাম

এতো ভোরে কে ফোন করলো ? ‘আমি ওয়েলার্স, চিফ । খবর শুনেছেন ?’ ওয়েলার্সের কণ্ঠে উত্তেজনা । ‘কোন খারাপ খবর ?’ জাতিগত দ্বন্দ্ব-সংঘাতমুখর জনপদে পরিবার-পরিজন ছাড়া নিঃসঙ্গ জীবন-যাপন করি, ভালো খবরের জন্য সবসময় উৎকর্ষ থাকলেও কেউ যখন বলে খবর শুনেছেন, তখন খারাপ খবরের আশঙ্কাই বুকুর ভেতর ছলকে ওঠে । ওয়েলার্স অনেকটা চেঁচিয়ে কথা বলে, ‘কেনিয়া এয়ারওয়েজের বিমান ক্রাশ করেছে । কাল রাতে যেটা আবিদজান থেকে গেল।’ আমার মাথা ঝিমঝিম করে, আমি আর ওকে কোন প্রশ্ন করতে পারি না। ‘চিফ, ইন্দর ছিল ওটাতে । সাতগুরু ট্রাভেলসের ইন্দর, ওই যে হালকা-পাতলা গড়নের ছেলোটা, সবসময় আমাদের টিকেট ইস্যু করে, নিজেই টিকেট নিয়ে আসে আমাদের অফিসে ।’ আমি ফোন রেখে দেই । ইন্দর শুধু অফিসেই টিকেট নিয়ে আসে না । ওয়েলার্স জানে না যে ও আমারই প্রতিবেশী, একই বাড়িতে, পাশাপাশি ফ্ল্যাটে থাকি আমরা । ওর বিয়ের সব আয়োজন সম্পন্ন । ইন্দর যাচ্ছে বিয়ে করতে । দুবাই থেকে নববধুর জন্য কতো গহনা কিনবে, কসমেটিকস কিনবে । দীর্ঘ প্রবাসযন্ত্রণার সবটুকু মূল্য দিয়ে যে স্বপ্ন কিনে কিনে ঝুলি পূর্ণ করেছে এতোদিন, সেই স্বপ্নের ঝুলি কাধে নিয়ে কাল রাতেইতো উড়াল দিল ইন্দর । ওর সেই স্বপ্নের ডানা ভেঙ্গে গেল ? পুড়ে ছাই হয়ে গেল রঙিন স্বপ্নের বাপি ! এক যুবকের, এক পরিবারের !

৪ মে, ২০০৭ রাতে আবিদজান থেকে উড়াল দেয় ‘আফ্রিকার প্রাইড’ কেনিয়া এয়ারওয়েজের কেকিউ-৫০৭ বোয়িং ৭৩৭-৮০০ বিমানটি । আমিওতো কতোবার এই রুটে এই কেকিউ-৫০৭-এ চড়েই ছুটিতে গিয়েছি । গভীর রাতে, অর্থাৎ ঘড়ির কাঁটায় তখন রাত তিনটা, ক্যালেন্ডারের পাতায় একদিন পেরিয়ে গেছে, যাত্রাবিরতির জন্য কেকিউ নামে ক্যামেরুনের বাণিজ্যিক রাজধানী দোয়ালায় । ওখান থেকে উড়তে না উড়তেই যান্ত্রিক ত্রুটি দেখা দেয় । যোগাযোগ বিচ্ছিন্ন হয়ে যায় বেইজের সাথে । এর পরে কি হয় আর কেউ জানে না । বিমানটি ক্যামেরুনের দোয়ালা শহর থেকে ২৩ কিলোমিটার পূর্বে গভীর পাহাড়ি-অরণ্যের ভেতরে এমবাসা-পোঙ্গা গ্রামে আছড়ে পড়ে । নিভে যায় ২৪টি দেশের ১১৪ টি জীবন-প্রদীপ ।

বিষণ্ণতায় ডুবে যেতে যেতে ভাবতে থাকি আর কেউ কি ছিল ওতে, কাছের কেউ, চেনা-জানা ? ও হ্যাঁ, আব্দুল ! আমাদের ট্রাভেল ক্লেইম ইউনিটের সহকর্মী, তানজানিয়ার যুবক । আমি আব্দুলের নাম্বারে ফোন করতে গিয়ে কি হয়, ফোন করি ইন্দরকে । ফোন বাজে না । এই ফোন আর কোনদিন বাজবে না ।

পরদিন রোববার । অফিস বন্ধ । কিন্তু অফিসে গিয়ে ব্রডকাস্ট দেখে জানতে পারি, আমাদের আরো তিন সহকর্মী ছিল ওই প্লেনে । তিনজনই জাতিসংঘ পুলিশ বাহিনীর সদস্য । আমি ওদের কাউকেই চিনি না । তাহলে আব্দুল ? ওরওতো ওই প্লেনেই ছুটিতে যাওয়ার কথা ছিল । আব্দুলের নাম্বার নেই আমার কাছে । পাগলের মতো একে-ওকে ফোন করতে থাকি । আব্দুলের স্ত্রী, ক্লিথিডাও এই মিশনেই কাজ করে । ওকে কি পাওয়া যাবে ? ক্লিথিডার বস মরক্কোর পুরুষ মোহাম্মদ আমার বন্ধু । মোহাম্মদকে ফোন করি । ওর কাছ থেকে নাম্বার নিয়ে ক্লিথিডাকে । ক্লিথিডা আমার ফোন পেয়ে হাউমাউ করে কাঁদতে শুরু করে । ক্লিথিডা কাঁদছে, তার মানে কি ? আব্দুলও ? কিন্তু ব্রডকাস্টে যে ওর নাম নেই ? আমি কিছুই বুঝতে পারি না । জাতিসংঘের তথ্য ব্যবস্থাপনার ওপর আমার খুব

একটা আস্থা নেই। তাহলে হয়ত আরো অনেকেই ছিল, ওরা নাম জোগাড় করতে পারে নি। কিছুক্ষণ কেঁদে ক্লিথিন্ডা বলে, নাও আব্দুলের সাথে কথা বলো। আমি কিছু বুঝতে পারছি কি-না সেইটাই বুঝতে পারছি না। ক্লিথিন্ডার কি মাথা খারাপ হয়ে গেল? ‘তুমি আমাকে ঠিক করে বলো, আব্দুল ওই প্লেনে ছিল, কি ছিল না?’ ক্লিথিন্ডা আবারও কাঁদে। ‘আমিতো ওকে যেতে দিই নি। বললাম, আমার সঙ্গে উইক-এন্ডটা কাটিয়ে দুদিন পরে, রোববার রাতে যাও।’ এবার সবকিছু আমার কাছে পরিস্কার। আব্দুল বেঁচে গেছে। আমি বলি, ‘আব্দুলকে ফোন দাও।’ আব্দুল ফোনের ওপাশে খিকখিক খিকখিক করে হাসে। ‘শোন, তুমি কখনোই ক্লিথিন্ডাকে একথা বলো না যে ও আমার জীবন বাঁচিয়েছে। তাহলে বাকী জীবনে আমার আর স্বাধীনতা বলে কিছুই থাকবে না। আই উইল বি অ্যা স্নেভ অব ক্লিথিন্ডা।’

আবিদজান, আইভরিকোস্ট

২২ মার্চ, ২০০৮